



Broj: 02-49-2-1129/17
Datum: 15.05.2017. godine

**OPĆINSKO VIJEĆE
T E Š A N J**

PREDMET: Informacija o radu javnih preduzeća kojima
je osnivač Općina Tešanj za 2016.godinu,-

Godišnji izvještaj o poslovanju javnih preduzeća Općine Tešanj, kao obavezu proisteklu iz člana 6. Zakona o javnim preduzećima da Skupština javnog preduzeća podnosi Općinskom vijeću izvještaj o radu i poslovanju, obuhvata:

- Odluku Skupštine dioničara o usvajanju izvještaja o poslovanju;
- Odluku Nadzornog odbora o usvajanju izvještaja o poslovanju;
- Izvještaj o poslovanju preduzeća, pripremljen u skladu sa utvrđenom formom i propisanim elementima koje izvještaj treba da sadrži;
- Izvještaj o radu Nadzornog odbora;
- Izvještaj revizije, i
- Finansijski izvještaj.

U cilju efikasnijeg rada, Vijećnicima su putem e-pošte dostavljeni kompletni izvještaji javnih preduzeća, a Informacija o poslovanju javnih preduzeća Općine Tešanj za 2016. godinu predstavlja kratak presjek najznačajnijih aktivnosti preduzeća u protekloj godini, daje pregled osnovnih finansijskih pokazatelja poslovanja na osnovu izvještaja o poslovanju za 2016. godinu te oslikava ciljeve i rezultate kao i mjere poduzimane radi ostvarenja ciljeva.

Općina Tešanj, odnosno Općinsko vijeće Tešanj osnivač je tri javna preduzeća:

1. JP RAD d.d.
2. JP TOPLANA d.d.
3. Agencija za razvoj TRA d.o.o.

JP „RAD“ d.d.

U skladu sa zaključcima Općinskog vijeća Tešanj, poslovna aktivnost JP "RAD" d.d. Tešanj, u toku 2016. godine trebala je biti usmjerena na:

- realizovanje zaključka Vijeća iz 2014. godine (povećanje kapitala za predane objekte RAD-u i snimiti godišnji obim otpada na području općine Tešanj, utvrditi % otpada koji se zbrine na deponiji i povećati broj korisnika za 5 %);
- realizaciju projekta gradnje novih bunara (značajnim finansijskim učešćem) u cilju povećanja količina pitke vode;
- Intenziviranje aktivnosti na proširenju obuhvata i povećanju broja korisnika sistema prikupljanja odvoza otpada.

Smjernice i zaključci Općinskog vijeća u okviru kojih je trebalo da se odvija poslovanje JP "RAD" d.d. Tešanj trebalo je ostvariti realizacijom slijedećih kratkoročnih ciljeva:

- kvalitetnim i kontinuiranim vodosnadbijevanjem, dispozicijom otpadnih voda, održavanjem komunalne higijene urbanih sredina i zbrinjavanjem komunalnog otpada doprinijeti razvoju i održavanju ekološke sredine, te podizanju kvaliteta života stanovništva,
- kontinuirano širenje obuhvata područja i broja korisnika komunalnih usluga, a samim time i obezbjeđenje rasta prihoda,
- instalacija i primjena GIS-a (geografskog informacionog sistema),
- dogradnja telemetrijskog upravljanja sistemom vodosnadbijevanja,
- kontinuirana dogradnja MIS-a (menadžment informacionog sistema),
- daljnje širenje reciklažnih otoka, izgradnja neophodne infrastrukture za selekciju i presovanje iskoristivog otpada,
- realizacija planiranih kapitalnih projekata shodno priloženom pregledu.

U oblasti vodosnadbijevanja JP "RAD" je pružalo usluge za 7.214 korisnika ili za 3,65% (253 korisnika više nego 2015. godine kada je broj korisnika iznosio 6.961). Tokom 2016. godine isporučeno je 1.160.779 m³ vode što je za 1,09 % manje nego prethodne godine. Tokom godine je zabilježena loša hidrološka situacija, ali je ipak obezbjeđen kontinuitet u snadbijevanju vodom, osim kraćih redukcija na vodovodu Kraševo. Vodovodna mreža proširena je na naselja Roše i Joldići, a značajnije povećanje broja korisnika se očekuje u toku 2017. godine zbog uvođenja novih korisnika na vodovodu Trepče-Medakovo i izgradnje vodovoda Tepe-Hrvatinići.

U distribuciji otpadnih voda tokom 2016. godine zabilježeno je 2.844 korisnika ili povećanje od 110 novih priključaka, odnosno 3,87% više nego prethodne godine.

U toku je realizacija projekta, koji vodi Općina Tešanj, na izgradnji sistema za prikupljanje otpadnih voda sa područja općine. U pripremi je izrada Idejnog projekta postrojenja za prečišćavanje otpadnih voda. Nakon realizacije I faze ovog projekta broj korisnika bi se trebao značajno povećati.

Prikupljanjem i deponovanjem komunalnog otpada obuhvaćeno je 6.352 korisnika, i za 307 korisnika je više nego u 2015. godini što je povećanje od 6,08% novih korisnika. U saradnji sa Općinom Tešanj, prijavom na javni poziv Federalnog ministarstva okoliša i turizma obezbjeđena su ukupna sredstva u iznosu od 108.000 KM (72.000 KM sredstva Fonda a 36.000 KM Općina i Rad) za nabavku prese u postupku recikliranja otpada, 2000 posuda za otpad i 200 kompostera. U toku 2017. godine posude za otpad će biti podijeljene besplatno novim korisnicima. Nabavkom prese stvoriće se preduslovi za dalji razvoj sistema odvojnog prikupljanja otpada.

Realizujući smjernice Općinskog vijeća o količinama otpada na području općine Tešanj, dostavljeni su slijedeći podaci:

- ukupna produkcija otpada na području općine Tešanj procjenjuje se na 11.627 t/god;
- organizovanim odvozom u toku 2016. godine prikupljeno je 7.516 t ili 64,64% od ukupnih količina otpada;
- u toku 2016. godine na gradskoj deponiji je deponovana količina od 7.498 t ili 99,76% ukupno prikupljenih količina;
- u toku 2016. godine reciklirano je 18 t ili 0,24% prikupljenih količina otpada.

Na osnovu ovih podataka može se konstatovati da su količine otpada koje se recikliraju zanemarljivo male u odnosu na ukupno prikupljene količine otpada, te da u ovoj oblasti JP "Rad" treba da uloži značajnije napore i intenzivira postavljanje reciklažnih otoka i druge aktivnosti kako bi se povećala količina recikliranog otpada, odnosno kako bi se smanjile količine otpada koje se deponuju.

U realizaciji zaključka Općinskog vijeća o povećanju kapitala društva objektima koji su predani na upravljanje preduzeću, JP "RAD" se upoznao sa proceduralnim pitanjima Komisije za vrijednosne papire. Zaključak je još uvijek u fazi realizacije kroz proučavanje "Smjernica metodologije evidencije javnog dobra" koje je dato na upravljanje i korištenje Preduzeću.

U cilju iznalaženja novih količina vode za potrebe izgradnje probno eksploatacionog bunara PEB 1 u Jelahu, riješeni su imovinsko-pravni odnosi i građevinska dozvola, a krajem decembra potpisan ugovor sa izvođačem radova a sa Općinom potpisan ugovor o sufinansiranju u vrijednosti od 165.467 KM. Realizacija ugovora kreće po sticanju povoljnih hidroloških uslova za izvođenje.

U toku 2016. godine gubitak vode u vodovodnom sistemu Tešanj-Jelah iznosio je 27,14% (2015. godine 28,97%), dok je na vodovodu Kraševo iznosio 20,17% (2015. godine 12,95%) pa se za općinski vodovodni sistem u cjelini može reći da gubitci iznose 26,44% (2015. godine 27,56%). Obzirom na starost vodovodne mreže održavanje gubitaka u sistemu ispod 30% je na granici pozitivnog odnosa ulaganja i efekata koji se postižu smanjenjem gubitaka.

Općinom Tešanj aplicirala je za učešće u MEG projektu koji finansira Vlada Švicarske, a implementira UNDP. U okviru ovog projekta značajne aktivnosti će se provesti u cilju smanjenja gubitaka u vodovodnoj mreži (intervencijama na sanaciji kvarova u roku 24 sata; nadzorom na sistemu granskih vodomjera; nadzorom na sistemu telemetrije; proširenjem sistema telemetrije; provođenjem seta mjera predviđenih MEG projektom).

U okviru sistema ISO 9001:2008 redovno, jednom godišnje provodi se anketiranje zadovoljstva kupaca. Prosječna ocjena zadovoljstva korisnika u 2016. godini je 4,41 a u 2015. godini je bila 4,43. U okviru upitnika korisnici usluga imaju mogućnost da daju primjedbe i sugestije koje se analiziraju i poduzimaju mjere za povećanje zadovoljstva korisnika. Rezultati ankete se objavljuju na web stranici preduzeća.

U toku 2016. godine u JP "RAD" d.d. Tešanj četiri uposlenika su napustila firmu a 2 su novoprimiteljni, tako da je na kraju godine bilo 85 uposlenika. Opredjeljenje uprave je bilo da ne vrši zapošljavanje u stalni radni odnos ni u jednom slučaju gdje to nije krajnje nužno. Kod svih upošljavanja primjenjivana je važeća zakonska regulativa i postupalo se po odredbama Pravilnika o zapošljavanju. Izvršen je jedan prijem u stalni radni odnos putem konkursa. Prijemi na određeno vršeni su shodno ukazanoj potrebi, takođe u skladu sa Pravilnikom o provođenju oglasne procedure. Uposleni su u toku godine ostvarili prosječnu neto platu u iznosu od 881 KM, topli obrok po radniku isplaćen je u iznosu od 261 KM a regres u iznosu od 864 KM. Istovremeno je maksimalno isplaćena plata u firmi iznosila od 2.303 KM a najmanja 520 KM.

U toku 2016. godine JP "RAD" d.d. Tešanj ostvarilo je ukupne prihode u iznosu od 3.569.239 KM što je za 3% manje u odnosu na 2015. godinu.

Struktura poslovnih prihoda je slijedeća:

- prihodi od vode čine 35,8% ukupnih prihoda i manji su za 1,2% u odnosu na prošlogodišnje;
- prihodi od zbrinjavanja otpada čine 29,7% i veći su 3,6%;
- prihodi od distribucije otpadnih voda čine 8,5% ukupnih prihoda i veći su za 7,6% u odnosu na prethodnu godinu, itd.

U toku 2016. godine ostvareni su ukupni rashodi u iznosu od 3.499.467 KM i manji su za 3,2% u odnosu na prethodnu godinu.

Struktura poslovnih rashoda je slijedeća:

- materijalni troškovi čine 16,3% i manji su za 3,1%;
- amortizacija čini 20,2% i manja je za 2,0%;
- troškovi plaća i ostalih ličnih primanja čine 56,7% rashoda i veći su za 0,4% itd.

U posmatranom izvještajnom periodu ostvarena je neto dobit preduzeća u iznosu od 61.612 KM. Iz ostvarene dobiti obavezno je u rezerve izdvojiti 20%, odnosno 12.322 KM, dok ostatak neto dobiti u iznosu od 49.290 KM ostaje neraspoređena dobit.

U toku 2016. godine Nadzorni odbor preduzeća održao je ukupno 9 sjednica, na kojima su razmatrana pitanja iz nadležnosti Nadzornog odbora. O svom radu Nadzorni odbor redovno izvještava Općinskog načelnika i resornu Službu dostavom zapisnika o održanim sjednicama. Nadzorni odbor je mišljenja da je Izvještaj o poslovanju preduzeća za 2016. godinu realan te da je na analitičan način prikazao poslovanje preduzeća. Sjednice su održavane prema potrebi a najmanje jednom u tri mjeseca.

Zaključci i smjernice Općinskog vijeća Tešanj za JP „RAD“ u 2017. godini

1. Realizirati zaključak Vijeća iz 2014. godine (povećanje kapitala za objekte koji su predati Rad-u na upravljanje);
2. Okončati projekt izgradnje probno-eksploatacionog bunara PEB 1;
3. Uložiti dodatne napore kako bi se besplatnom podjelom posuda za otpad, nabavljenih iz sredstava Federalnog ministarstva okoliša i turizma, povećao broj korisnika za minimalno novih 2000 korisnika;
4. Povećati količinu recikliranog otpada na 1% od ukupno prikupljenih količina, ili cca 75 t.

JP „TOPLANA“ d.d.

U skladu sa zaključcima Općinskog vijeća Tešanj, poslovna aktivnost JP “TOPLANA” d.d. Tešanj, trebala je biti usmjerena na:

- sanaciju deponije šljake kao uslov produženja/dobijanja okolinske dozvole za rad “Toplana” (II faza),
- zadržati dostignuti stepen naplate od 81% uz ulaganje napora na povećanju ovog procenta,
- “Toplana” će nastaviti sa aktivnostima na obezbjeđenju projektne dokumentacije za širenje obuhvata toplifikacije i nove investicije u povećanje efikasnosti sistema,
- realizirati zaključak Općinskog vijeća - povrat starih korisnika, kao i proširenje mreže na nove korisnike (okončati razgovore i potpisivanje ugovora sa Mann+Hummelom),
- analizirati mogućnost poboljšanja politike troškova priključka i cijene grijanja.

U cilju realizacije zaključaka "Toplana" je u planu rada za 2016. godinu postavila slijedeće ciljeve:

- a) sanaciju deponije šljake II faza,
- b) potpisivanje ugovora sa MANN-HUMMEL BA,
- c) zadržati postojeće kupce toplotne energije,
- d) smanjiti broj opravdanih reklamacija,
- e) realizovati definirane ciljeve kvaliteta i okolinske operativne ciljeve za 2016. godinu,
- f) pružiti maksimalnu podršku projektu GOLD u implementaciji istog na području općine,
- g) u saradnji sa osnivačem i većinskim vlasnikom Općinom Tešanj, raditi na implementaciji Zakona o komunalnim djelatnostima, te na izradi podzakonskih akata koje treba donijeti Općinsko vijeće, kao i Odluke o novom tarifnom modelu.

U toku 2016. godine “Toplana” je svoju osnovnu funkciju, proizvodnju i distribuciju toplotne energije obavljala sa 22 zaposlena radnika koliko je imala i u prethodnoj godini. Ukupan broj korisnika usluga i grijana površina je povećana za dio potpisanog ugovora sa firmom MANN HUMMEL BA. Ukupni broj korisnika usluga privrednih i fizičkih lica je 684 (79+605), a ukupna grijana površina iznosi cca 71.397 m² prema slijedećoj strukturi: stambeni prostor 30.957 m², poslovni prostor 29.250 m² i proizvodni prostor 50.666 m³ (11.190 m²). U odnosu na prethodnu godinu broj korisnika povećan je za 6% odnosno od 644 korisnika u 2015. godini povećan je na 684 u 2016. godini, dok je grijana površina povećana za 25% odnosno u 2015. godini je grijano 72.955 m², a u 2016. godini grijana površina iznosi 91.397 m².

Postavljeni cilj o sanaciji deponije šljake kao jedan od preduslova za produženje okolinske dozvole, realiziran je sa 80%. Sanacija deponije je planirana da se realizuje fazno, u toku 2015. godine pripremljena je revizija projekta sanacije deponije te urađeno novo-fazno projektno rješenje realizacije projekta čija druga faza je okončana u toku 2016. godine.

Nakon što je Općina Tešanj finansirala izradu Idejnog projekta toplifikacije općine Tešanj obnovljivim/ekološki prihvatljivim izvorima energije u okviru projekta “Toplifikacija Pousorja (općine Tešanj, Usora i Doboju Jug)” trebalo je da se od strane Kantona realizira izrada Studiju toplifikacije Pousorja. Nakon Pisma namjere u izradu Studije se uključila REZ Agencije koja je istu predfinansirala sa 20.000 KM. Nacrt Studije je završen. Finalizacija Studije uslovljena je dodatnim radnjama pa je odlučeno da se izdvoji općina Tešanj kao I faza u realizaciji Studije jer je Općina Tešanj pokazala najveću zainteresiranost za Studiju i javno-privatno partnerstvo.

Jedan od zacrtanih ciljeva za 2016. godinu odnosio se na zadržavanje stepena naplate na 81% i dalje poboljšanje naplate potraživanja. Cilj je u cjelosti realiziran, procenat naplate iznosi 93% (u ovaj procenat uključeni su sporazumi o reprogramiranju duga zaključeni sa Pobjeda d.d. i Opća bolnica Tešanj).

U cilju realizacije definiranih ciljeva kvaliteta i u cilju provedbe obaveza vezanih za Okolinsku dozvolu i standard ISO 14001, u toku 2016. godine vršen je redovan monitoring kvaliteta zraka, te sastav dimnih plinova na dimnjaku. U cilju smanjenja emisije dimnih plinova i poboljšanja procesa sagorijevanja uglja nastavljeno je korištenje odgovarajućih aditiva-katalizatora i ugljenog peleta.

U okviru povećanja stepena saradnje sa Osnivačem, zajednički je realizirana priprema izmjena i dopuna odluke o daljinskom grijanju, čijim usvajanjem je Općinsko vijeće dalo podršku projektu energetske efikasnosti za sve korisnike toplotne energije koji kroz zakonom propisane procedure obezbjeđuju energetske certifikate.

U toku 2016. godine „Toplana“ je ostvarila ukupne prihode u iznosu od 1.794.833 KM što je u odnosu na prethodnu godinu više za 93.035 KM ili 5,5%. Ukupni rashodi su ostvareni u iznosu od 1.712.999 KM, što je u odnosu na rashode iz prethodne godine više za 2%. Na osnovu ovih pokazatelja „Toplana“ je ostvarila neto dobit u 2016. godini u iznosu od 75.181 KM ili 132% više nego u prethodnoj godini. Dobit se raspoređuje za pokriće gubitaka iz prethodnog perioda.

Broj zaposlenih je nepromijenjen - 22 uposlenika koja su u izvještajnom periodu ostvarila posljednju isplaćenu minimalna plata u iznosu od 505 KM te posljednju maksimalnu plata u iznosu od 2.320 KM a sve na prošlogodišnjem nivou. Prosječna neto plata po radniku iznosila je 896 KM, topli obrok 223 KM i regres u iznosu 896 KM. Prosječna ukupna primanja po radniku ostvarena su u iznosu od 1.229 KM i manja su za 3% u odnosu na prethodni izvještajni period.

U godišnjem izvještaju „Toplana“ d.d. Tešanj svakako je potrebno navesti ishod sudskih sporova koji su bili aktuelni u toku protekle godine.

Vrhovni sud FBiH donio je presudu kojom je reviziju tužene JP „Toplana“ d.d. uvažio, i odbio tužbeni zahtjev tužitelja Plančić Sejde, bivšeg direktora preduzeća, u cjelosti. Vrhovni sud je odbio i zahtjev za vraćanje na poziciju direktora u periodu 11.05.2011. do 15.02.2013. godine i isplatu plaća za cijeli taj period. Vrhovni sud je odbio i tužbeni zahtjev tužitelja Sejde Plančića za isplatu neiskorištenih radnih sati i potraživanja naknade za prekovremeni rad. Donošenjem ove revizijske presude, nesumnjivo je utvrđeno da su odluke Nadzornog odbora i Skupštine društva zakonite. Donošenje ovakve presude stekli su se uslovi za pokretanje sudskog postupka protiv Sejde Plančić radi vraćanja isplaćenih sredstava u ukupnom iznosu od 52.200,73 KM (32.159 KM naknada plate, 10.781,13 KM doprionosa za PiO, 4.020 KM na ime neiskorištenih radnih sati i 5.240,60 KM na ime troškova postupka). Od pokrenutih sudskih postupaka za vraćanje sredstava jedan je u izvršnoj a drugi u žalbenoj fazi.

Sudski spor Deljković Hanife protiv „Toplana“ d.d. i „AB-trans“ d.o.o. Tešanj, radi nasknade štete nastale prilikom izvođenja radova na vrelovodnoj mreži „Simetrane-SŠC Tešanj“, okončan je zaključenjem sudske nagodbe za iznos od 16.000 KM štete i 450 KM troškova postupka. Troškove će namiriti „AB-trans“ d.o.o. Tešanj jer je kao izvođač radova po ugovoru u cjelosti uzrokovao nastalu štetu tužiteljice Deljković Hanife.

Na dan 31.12.2016. godine „Toplana“ ima 701.552 KM potraživanja do godinu dana, u okviru čega potraživanja od fizičkih lica iznose 175.969 KM a potraživanja od pravnih lica 525.583 KM. Potraživanja starija od godinu dana iznose 31.727 KM od čega fizička lica čine 26.085 KM a pravna 5.652 KM.

Zadovoljstvo korisnika usluga mjeri se provođenjem Ankete svake sezone grijanja. Upitnik je kreirala certifikacijska kuća u saradnji „Toplana“ d.d. Nakon provedene ankete vrši se analiza dobijenih rezultata i poduzimaju mjere koje su propisane standardom 9001:2008 i 14001:2004 koji su implementirani u „Toplana“ d.d.

Nadzorni odbor JP „Toplana“ u 2016. godini održao je 9 redovnih sjednica i na taj način vršio kontinuiran nadzor nad radom i poslovanjem društva i Uprave, uz redovno izvještavanje Općine. Izvještaj o poslovanju za proteklu godinu je usvojen uz konstataciju da su postavljeni ciljevi za 2016. godinu realizirani te da je vrlo bitno da su stvoreni uvjeti za proširenje broja korisnika kao i za priključenje ranijih korisnika koji su se isključili sa mreže na njihov zahtjev. Plan je da se nastavi sa započetim aktivnostima kao i da se kontinuirano radi na unapređenju poslovanja u svim segmentima koristeći savremene tehnike marketinga. Osim toga naglašena je dotrajalost proizvodnih postrojenja i potreba zamjene postojećih kotlova novim postrojenjima.

Zaključci i smjernice Općinskog vijeća Tešanj za JP „TOPLANA“ u 2017. godini

1. Završiti posljednju III fazu sanacije deponije šljake kao uslov produženja/dobijanja okolinske dozvole za rad "Toplana",
2. Kao trajan proces zadržati minimalno stepen naplate (81%) uz ulaganje dodatnih napora na povećanju procenta naplate potraživanja,

3. Zbog evidentne stagnacije u priključenju, novim korisnicima kao poticajnu mjeru podržati prijedlog Uprave i Nadzornog odbora da se svim novopriključenim korisnicima iz kategorije stambenih prostora, koji imaju tehničku mogućnost priključenja, odobri stimulatивно besplatno grijanje za jednu grejnu sezonu, uz obavezu da moraju ostati korisnici usluga naredne tri godine.

Agencija za razvoj „TRA“ d.o.o.

U skladu sa zaključcima i smjernicama Općinskog vijeća Tešanj, poslovna aktivnost Agencije za razvoj Općine Tešanj "TRA" d.o.o. u toku 2016. godine trebala je biti usmjerena na:

- aktivnosti pripreme i implementacije primarno projekata za potrebe realizacije strateških ciljeva Općine Tešanj, javnih preduzeća i javnih ustanova,
- obezbjeđenje veće transparentnosti i stabilnosti u provođenju postojećih projekata, kako bi se ostvarilo puno povjerenje donatora i partnera te novi projekti,
- OSS ured za rad sa investitorima i poslovnom zajednicom će konstantno unapređivati svoj rad te postati Savjetovalište za privrednike i servis "sve na jednom mjestu",
- intenziviranje aktivnosti na obezbjeđenju dalje finansijske samostalnosti u radu Agencije (dalje smanjenje učesća Općine u finansiranju rada).

U cilju realizacije zaključaka "TRA" je u planu rada za 2016. godinu postavila slijedeće ciljeve:

- a) kreirati usluge Centra za investicije/OSS ured z najmanje tri preduzeća;
- b) kao tehnički sekretarijat SLER-a pripremiti najmanje tri sjednice;
- c) stvaranje lanca vrijednosti u proizvodnji jagodičastog voća za korisnike projekta "Podizanje nasada maline" kroz obezbjeđen otkup za najmanje 37 korisnika;
- d) organizacija plasteničke proizvodnje u povrtlarstvu za korisnike projekta "Kroz poljoprivredu do zapošljavanja", za minimalno 5 korisnika;
- e) pripremiti najmanje 2 projektna prijedloga;

Planirane aktivnosti tokom 2016. godine "TRA" je realizirala na slijedeći način:

U okviru aktivnosti projektnog menadžmenta pripremljeno je i aplicirano sa ukupno 14 novih projektnih aplikacija. Agencija trenutno u fazi realizacije ima 7 projekata koji su odobreni, u fazi ocjenjivanja je 9 projektnih prijedloga dok dva projektna prijedloga nisu odobrena.

U fazi realizacije su dva velika projekta "COBEAR" i "Podizanje nasada maline".

Projekt COBEAR je tokom 2016. godine bio u drugoj godini implementacije. Aktivnosti su uglavnom bile usmjerene na pružanje konkretnih usluga za mala i srednja preduzeća u BEAR području i promociju samog projekta kroz medije. Aktivnost je konkretno bila usmjerena na certificiranje sistema, procesa i proizvoda, stvaranje prototipa i brendiranje proizvoda.

U cilju unapređenja kapaciteta izvozno orijentisanih malih i srednjih preduzeća tokom 2016. godine je održano 6 seminara kojima je prisustvovalo 146 zaposlenika. Seminari su pored teorijskog sadržavali i praktični dio edukacije kroz koju su obrađivane teme koje su najznačajnije za 4 sektora: metaloprerađiva, drvoprerađiva, tekstilni i prehrani sektor. Uposleni su između ostalog mogli dobiti odgovore na pitanja kako optimizirati serijsku proizvodnju u tekstilnoj industriji, koji su najvažniji certifikati u drvenoj industriji, kako zaštititi intelektualno vlasništvo, kako pojednostaviti carinske procedure i steći status odobrenog izvoznika, kako istraživati tržište i odgovoriti specifičnim zahtjevima kupaca.

Pripreme za certificiranje su urađene u 13 preduzeća. Usluge brendiranja su izvršene za 4 privredna subjekta iz BEAR područja.

U centru za obrazovanje odraslih nabavljena je nova oprema kako bi se poboljšali uslovi za edukaciju i dokvalifikaciju.

Dva privredna društva "Inox Ajanović" d.o.o. i "Pobjeda" d.d. Tešanj dobile su prototip svojih proizvoda koji će im ojačati ponudu na ino tržištu.

Izrada dvojezičnog kataloga za 33 firme je takođe jedna od aktivnosti koja je realizirana tokom druge godine implementacije COBEAR projekta.

Tokom 2016. godine projektni Tim COBEAR projekta učestvovao je na dva sajma, koja su iskorištena za promociju projekta.

Podizanje nasada maline je projekt vrijedan 280.872,85 KM doniran od strane Katarske organizacije Charity al Qatariya čije trajanje je planirano dvije godine. Cilj projekta je da prati cijeli ciklus podizanja zasada maline - od momenta odabira kandidata, pripreme zemljišta i sadnje do prve berbe. Cijeli ovaj period je predviđena podrška agronoma svim korisnicima projekta. U toku 2016. godine održani su brojni programi stručne obuke korisnika projekta. Takođe su održane studijske posjete proizvođačima u Željeznom Polju i institucijama za podršku proizvodnji malina u Republici Srbiji smještenim u Arilju i Ivanjici.

Tokom 2016. godine izvršena je službena registracija Udruženja proizvođača jagodičastog i bobičastog voća Tešanj koje broji 46 članova.

Projekt povećanja prihoda ugroženih grupa u toku 2016. godine započeo je realizacija kroz porodičnu poljoprivredu. Projekt je odobren od strane Češke Republike u vrijednosti 450.000 EUR, planiran za period 2016.-2018. g. a "TRA" će tokom 2019. g. nastaviti samostalno implementaciju. Putem javnog poziva izvršen je izbor 50 korisnika kojima će biti dodijeljeni plastenici (3000 m²) uključujući montažu i prateću opremu koja uključuje sistem za navodnjavanje, kontejner i dozator za gnojivo i pumpu, analizu zemljišta, sadni materijal, gnojivo i zaštitna sredstva za prvu godinu trajanja projekta.

Projekat Podizanja zasada maline na području općine Tešanj podržan je od strane Federalnog ministarstva za razvoj, poduzetništvo i obrt sa iznosom od 24.980 KM. Podrška se ogledala u nabavci mašinskih prskalica, izradi publikacije proizvodnja maline, priprema i štampanje, okrugli sto – smjernice za jačanje proizvodnje malina i posjeta Sajmu u Novom Sadu.

Projekat Unapređenje otkupa mlijeka na području općine Tešanj u vrijednosti 52.076,25 KM implemenirala je "TRA" u partnerstvu sa zadrugama "Kapi života" i "Zlatna kap" uz finansijsku podršku Ministarstva za poljoprivredu, šumarstvo i vodoprivredu ZDK. U okviru projekta realizirane su slijedeće aktivnosti: obuka za kooperante, nabavka milkotestera, nabavka muzilica, testova i prateće posude za testiranje mastitisa, podjela kooperantima, posjeta Sajmu u Novom Sadu, organizacija okruglog stola, predstavljanje projekta i priprema promotivnih materijala.

COBEAR projekat podržan je od strane Federalnog ministarstva za razvoj, poduzetništvo i obrt sa iznosom od 20.000 KM. U sklopu projekta planirana je obuka iz područja Lean Production i Six Sigma-Green Belt / Zeleni pojas a najmanje 10 predstavnika vršnog i srednjeg rukovodstva iz firmi koje primjenjuju najnovije tehnike i alate u upravljanju proizvodnjom u trajanju od tri mjeseca, prema propisanim standardima i od strane certificiranih predavača. Osim toga planirano je izdavanje i predstavljanje specijalizovane publikacije, zatim organizacija poslovne posjete institucijama u jednoj od država iz EU koje se bave podrškom poduzetništvu i razvoju biznisa, itd.

OSS URED-COBITES uspostavljen je u sklopu aktivnosti usmjerenih na kreiranje povoljnog poslovnog okruženja, promocija ekonomskih potencijala Općine Tešanj, teritorijalnog marketinga, podrška izvozu i investicijama. OSS ured je bio operativan tokom godine i pružao usluge fizičkim i pravnim licima.

Kroz dva projekta Agencije uključeno je 38 privrednih subjekata i 3.233 uposlenika tih firmi. Osim toga uključeno je 135 osoba (50 - malina, 50 - plastenici i 35 - muzilice) kroz projekte u oblasti poljoprivrede.

Kroz Anketu o zadovoljstvu korisnika sumirane su usluge koje je Agencija pružala prema privrednim subjektima i građanima. Ispitivanje zadovoljstva korisnika pruženim uslugama vrši se putem on line anketnih upitnika koji su postavljeni na web stranici. Anketa je pokazala da su korisnici usluga uglavnom zadovoljni pruženim uslugama (73,3%), dok se pokazalo da nema dovoljno saznanja o uslugama koje se mogu dobiti u OSS uredu Agencije (46,7%).

U toku 2016. godine nakon što su Agenciju napustila dva uposlenika, ukazala se potreba za angažman na poziciju finansijskog menadžera projekta COBEAR. Nakon provedene procedure na konkurs za koji je stiglo 6 prijava, 5 ih je bilo formalno ispravnih. Kandidati koji su zadovoljili formalno-pravne uslove konkursa pozvani su na intervju. Nakon provedenog intervjua Komisija je izvršila bodovanje i

predložila direktoru da donese odluku te da sa kandidatom zaključi ugovor o radu na određeno vrijeme do okončanja implementacije projekta COBEAR.

Na poziciju agronoma nakon što je dotadašnji uposlenik napustio Agenciju, provedena je procedura za angažovanje na poslove koordinatora projekta "Podizanje nasada maline na području općine Tešanj". Nakon što je izvršena provjera na evidenciji Zajednice za zapošljavanje u Tešnju, od tri prijavljena kandidata na evidenciji niti jedan nije ispunjavao potrebne uslove. Interes za angažman iskazao je i agronom iz Maglaja koji je već imao iskustva na poslovima podizanja nasada maline. Nakon dobijenih pozitivnih preporuka izvršeno je angažovanje agronoma.

U toku 2016. godine Agencija je ostvarila ukupne prihode u iznosu od 640.928 KM koji su veći za 50,36% u odnosu na prethodnu godinu.

Dotacija Općine Tešanj u 2016. godini iznosila je 87.074 KM ili 11,5 % više nego prethodne godine. U ovom iznosu uključen je i iznos za vlastito učešće u realizaciji projekata u iznosu od 40.922 KM. Agencija je ostvarila ostale prihode: Centar za obrazovanje – 14.802 KM, projekt maline – 58.306 KM; projekt COBEAR – 416.817 KM te sredstva ostavljena po osnovu poticaja kantonalnog i federalnog ministarstava.

Učešće Općine Tešanj u ukupnom finansiranju rada Agencije čini 54 % za troškove rada Agencije i učešće u projektima 46 %.

U 2016. godini rashodi su pratili prihode pa su tako ostvareni u iznosu 639.014 KM i veći su za 50,88 % nego u prethodnoj godini.

U posmatranom periodu ostvarena je neto dobit u iznosu 1.676 KM. Iz ostvarene dobiti obavezno je u rezerve izdvojiti 20% dok ostatak neto dobiti ostaje neraspoređena dobit.

Na kraju izvještajnog perioda Agencija je zapošljavala 4 radnika. Prosječna neto plata zaposlenih iznosila je 1.187,77 KM, posljednja minimalna plata isplaćena je u iznosu od 884,17 KM a maksimalna u iznosu od 1.803,89 KM. Regres je isplaćen u iznosu 420 KM po radniku.

Nadzorni odbor Agencije održao je 5 sjednica, uz redovno izvještavanje Općine. Na kraju izvještajnog perioda Nadzorni odbor konstatuje da su postavljeni ciljevi u Agenciji realizirani. Zaključeno je da Agencija treba da postane prepoznatljiva po inovativnosti i podršci privredi, da nastavi saradnju sa Udruženjem-Udrugom privrednika "Biznis-centar" Jelah-Tešanj, da razvija i koordinira potrebe privrede i općine Tešanj sagledavajući resurse Općine.

Zaključci i smjernice Općinskog vijeća Tešanj za „TRA“ u 2017. godini

1. Agencija će nastaviti redovne aktivnosti pripreme i implementacije projekata za potrebe realizacije strateških ciljeva Općine Tešanj, javnih preduzeća i javnih ustanova.
2. Kroz medijsko predstavljanje i drugim pogodnim aktivnostima upoznati poslovnu zajednicu i građane sa radom OSS ureda i mogućnostima koje pruža (Savjetovanište za privrednike i servis "Sve na jednom mjestu").
3. Organizirati obuke radne snage na osnovu Analize usaglašenosti sistema obrazovanja sa potrebama privrede.
4. U saradnji sa Općinom Tešanj obezbijediti prijem minimalno jednog volontera.

OBRADIVAČ

Služba za finansije, privredu, komunalne i inspekcijske poslove
Hamzalija Hojkurić, dipl.ecc

OPĆINSKI NAČELNIK

Mr.sci.Suad Huskić